

Tässä saat sinun äänestyskortin 2017 vuen septemberin kirkkovaalihin

Pyhänä 17 septemperiä on Ruottin kirkkovaalit. Sulla on silloin mahdollisuus äänestää niitä porukoita ja henkilöitä, jotka on mukana päättämässä kirkon elämästä ja toiminasta neljänä seuraavina vuosina. Kelle sie haluat antaa sinun luottamusta?

----- (Esitteen sisäpuoli) -----

Vaikuta tulevaisuutheen – äänestä kirkkovaalissa!

Mitäs sie toivot ette Ruottin kirkko pittää tehä? 17 septemperiä järjestethään kirkkovaalit. Silloin sie ja kaikki muut Ruottin kirkon jäsenet päättää Ruottin kirkon tulevaisuudesta. Kaikki jotka on täyttäneet 16 vuotta ja on kirkon jäsenet saattavat äänestää kirkkovaalissa. Kukkas saavat sinun luottamuksen ja pääsevät päättämähän neljänä tulevina vuosina? Kuinkas sinun kirkkovero pittää käyttää? Minkälaista toimintaa sinun seurakunnassa pittää järjestää? Mihinkä asihoiin Ruottin kirkon pitäis ottaa kantaa? Kirkkovaalit antavat sulle mahdollisuuden vaikuttaa!

Ruottin kirkko on monessa paikassa. Sillä on seurakuntia ympäri maata ja monessa paikoissa ulkomaila, mutta se on kans aktiivi internetissä, sosiaalisessa meetiassa, sairaaloissa ja monessa muissa paikoissa. Tehtävä on ette olla ihmisitten tukipuuna sielä, missä het nyt kaikin onkin.

Kirkkovaalissa sie äänestät numineerinkiporukoita. Äänestäminen tapahtuu suuriin piirthein samala tavala kuin puolueitten äänestys valtiopäivävaalissa. Sulla on mahdollisuus äänestää kolmela eri tasola: paikallisesti sinun omassa seurakunnassa, alueelisesti hiippakunnassa, mihinkä kuulut, ja kansalisela tasola.

Onko sinun äänestyskortti kaonu eli haluatko saa lissää tietoja kirkkovaalista?

Lue lissää atressista svenskakyrkan.se/kyrkoval.

----- (Folderns insida) -----

Isot tapahtumat

Elämässä tapahtuu paljon hyvinki suuria asioita. Kun esimerkiks kantaa sylissä ensimmäistä kertaa vastasyntyneen lapsen, rakastuminen, kokea epäonnistumisia ja pettymyksiä, kun kriisi tullee eli läheinen kuolee. Kirkko on ilon ja surun yhteisö, jossa saatama tuntea yhteenkuuluvuutta muitten ihmisten ja Jumalan kans.

Kirkon perinheet ja rituaalit, kuin jumalanpalvelukset, joulun ja pääsiäisen fiirausta, pyhämiestenpäivä, kaste, konfirmaasjuuni, avioliittoon vihkiminen ja hautaus, antavat meile tilaisuuden näyttää kiitolisuutta, iloa, uskoa ja epäilyä.

Elävä kulttuuriperine

Ruottissa on suunile 3 400 kirkkoa, jotka kuuluvat Ruottin kirkole. Jokhainen kirkkorakenus selittää ommat kertomusta uskosta, jumalanpalveluksista, musiikista, arkkitehtuurista, alueen

histuuriasta ja niistä ihmisistä, jotka asuit ja asuvat siellä. Se on yniikkiä, yhteistä ja elävää kulttuuriperinettä, jonka juuret on tuhansia vuosia vanhoita.

Paikka lapsile ja nuorile

Lapsila on tärkeä asema Ruottin kirkossa, ja lapsen paras pittää aina olla aina pääpistheenä. Seurakunnilla on ympäri maata paljon tarjottavaa. Toiminthaan kuuluvat muun muassa avoin esikoulu, kesätoimintoja, kuoroja, lauluhetkiä beipiksen kans, skauttihommia, tyär- ja poikaryhmiä, vanheemitten kahvilat ja paljon muuta.

Elämän raskhaat hetket

Kirkon tehtävä on ette kuunella, tueta ja auttaa sekä antaa ihmisile maholisuuen nostaa esile kokemuksia häästä ja vaikeista tilanheista ja huomauttaa vääryyksistä. Tärkeä osa Ruottin kirkon sosiaalisesta työstä on ette tarjota maholisuuksia osalistua erilaishiin keskustelhuin. Riippumatta jos olet akyytti kriisissä, surun keskelä eli kaipaata muista syistä juttuseuraa. Diakoonila ja papila on vaitiolovelvolisuus.

Rauha ja turvalisuus

Ruottin kirkko on yks Ruottin suuriimista kehitysavun aktööristä. Mailmassa moni pärjää hyvin, mutta toiset joutuvat vieläki taistelemhaan ruan, elämän ja oikeuksitten puolesta. Tämän vuoksi Ruottin kirkola on ittesthään selvä tehtävä kans kansanvälisesti. Ruottin kirkko on kans ulkomaila. Noin 45 paikkakunnala ympäri mailmaa on ulkomaankirkon seurakunnat jotka tarjoavat turvalisen paikan missä saatama tuntea yhteisyyttä, olla jumalanpalveluksissa ja saa tukea.

Sinua tarvithaan!

On paljon maholisuuksia sille joka haluaa olla aktiivina. Antaa lahjan eli olla töissä volontäärinä sinun omassa seurakunnassa. Volontääritten tarve on suuri, ja monessa seurakunnissa sie saatat antaa sinun aikaa erinlaishiin sosiaalishiin homhiin. Se saattaa olla vaikkapa tueta ihmisiä jotka on hakeutunheet Ruothiin, kahvin keittoa eli auttaa soppaköökissä. Eli olla kävelemässä vanhusten kans tai olla kirkon ophaana kesänaikana. Pitämällä huolta toisista saatama olla sellainen kirkko, jota Jumala haluaa ette olema.

Folderin faktaruutuja:

- Noin 40 000 lasta ja raavasta kastethiin vuona 2016.
- 3 000 Ruottin kirkon kirkkorakenuksista on Ruottin kulttuuriympäristönlain suojelussa.
- Sjuurissa oleva pappi on sinua varten. Voit soittaa numerhoon 112 joka päivä kl 21–06.
- Ruottin kirkko jakkaa joka päivä ruokapakeettia koittomile ja muile hätäntynheile.
- Ruottin kirkko vaikuttaa ulkomaila noin 100 paikkakunnala ympäri mailmaa.
- Ruottin kirkon yli 5 000 kirkkokuoroissa on noin 100 000 ihmistä aktiivina.
- Ruottin kirkko kohtaa joka vuosi noin 30 000 15-vuotiaasta nuorta konfirmasjuuniaikana.
- Ruottin kirkko kuuluu ACT-allianshiin, jossa on 143 uskonon pohjala olevia kehitystyöjärjestäjiä ympäri mailmaa.

Äänestyskorttiin liittyvät tiot on käännetty monele eri kielile. Löyät eri kieliversjuunit osoittheesta www.svenskakyrkan.se/kyrkoval/languages.

----- (Äänestyskortti) -----

Äänestyskortti – kirkkovaalit 17 septemberiä 2017

Näin äänestät kirkkovaalissa

Kaikki Ruottin kirkon yli 16-vuotihaat jäsenet saavat äänestää kirkkovaalissa. Äänestäminen tapahtuu suurin piirthein samala tavala kuin tavalisissa vaalissa. Sulla pittää olla matkassa sinun äänestyskortti eli sinun henkilötoistus ennen kun saatat äänestää vaalipaikassa (atressi katto ylhäälä).

Etukätheen äänestys 4 –17 septemberiä

– Koko maan äänestyspaikoissa

Voit äänestää etukätheen koko maassa 4–17 septemberiä. Osoittheessa www.svenskakyrkan.se/kyrkoval on kartta, mihinkä on merkattu kaikki äänestyspaikat ja aukioloaijat. Jos sulla ei ole äänestyskorttia, ota ensi käessä yhteyttä sinun omhaan seurakunthaan. Voit kuitekki saa uuen äänestyskortin kans muista paikkakunnista. Sie häyt sillon saattaa lekitimeerata ittesti.

– Preiviäänestys

Muu keino on ette äänestää etukätheen preivilä . Sitä varten tarttet preiviäänestyspakeetin, jonka saat pastoraatin- eli seurakunnan ekspetisjuunista. Pane posthiin sinun preiviäänestys, ette se on perilä hiippakunnassa viimisthään perjantaina 15 septeemberiä. Sie häyt kans panna matkhaan sinun äänestyskortin samhaan lähätyksheen.

– Äänestää ombyytin kautta

Ombyytin kautta äänestäminen tapahtuu vastaavala tavala kuin preiviäänestys. Se saattaa olla paras altternatiivi, jos et itte pääse äänestyspaikale. Ombyytin kautta äänestäminen vaatii ette sulla hääty olla preiviäänestyspakeetti (katto ylhäältä). Äänestyskortti pittää olla matkassa, kun ombyyti jättää preiviään sinun vaalipaikassa eli pastoraatin/seurakunnan äänestyspaikassa.

Äänestys vaalipäivänä 17 septemberiä

– Sinun vaalipaikassa

Äänestyskorttiin on merkattu missä vaalipaikassa sie saatat äänestää, sekä sen aukioloaijat (katto ylhäältä). Ota matkhaan sinun äänestyskortti eli sinun henkilötoistus.

– Äänestyspaikassa

Jos olet vaalipäivänä jossaki muussa paikkakunnassa, voit äänestää äänestyspaikassa. Sulla häätyy sillon olla sinun äänestyskortti matkassa.

Jos olet ulkomaila

Ruottin väestörejisteriin merkatut ja vaalitten aikana ulkomaila olevat henkilöt saattavat äänestää preivin kautta (katto ylhäältä). Preiviäni lähätethään kirkkohallituksele niin, että se on perillä viimisthään keskiviikkona 13 septemberiä. Äänestäjä voi pyytää jos tarvittee uuen äänestyskortin. Se lähätethään hälle ulkomaankirkon seurakunnan kautta.

Sinun ääni päättää, kuinka Ruottin kirkkoa ohjathan

Kirkkovaalissa mennee äänestää kolmela eri tasola:

Kirkkovaltuustovaalit – paikallinen taso

Sie äänestät kirkkovaltuustuhoon sinun omassa seurakunnassa/pastoraatissa. Tällä tasola tehään päätökset toiminasta, joka koskee sinua enniiten. *Valkeat vaaliliput.*

Hiippakuntavaalit – alueellinen taso

Ruottin kirkko on jaettu 13 hiippakunthiin. Hiippakuntavaltuusto on hiippakunnan korkein päättävä orkaani. Hiippakunnan ensi käen tehtävä on ette ekspertti avula monela aloila tueta seurakuntia niitten toiminassa ja hallintotehtävissä. *Roosa vaaliliput.*

Kirkkokokousvaalit – kansallinen taso

Kirkkokous on Ruottin kirkon korkein päättävä orkaani, jossa on 251 jäsentä. Se päättää kirkon yhteisistä ja ylheisistä asioista. *Keltaset vaaliliput.*

Mitä ja ketä saatan äänestää?

Kirkkovaalissa sie äänestät numineerinkiporukoita ja niitten kantitaattia. Ryhmät ja kantitaatit löyvät atressista www.svenskakyrkan.se/kyrkoval. Ryhmät antavat itte tietoa heän omasta vaaliohjelmasta. Voit äänestää kolmea kantitaattia kryssaamailla heät vaalilipussa. Kryssi parantaa kantitaatin maholisuuksia tulla valituksi ja päästä eustamhaan sinua. Jos et merkitte kantitaattia kryssilä, sinun ääni mennee numineerinkiporukale.

Jos olet kaottanut sinun äänestyskortin

Jos olet kaottanu sinun äänestyskortin, voit saa uuen (ns. kopio sinun äänestyskortista). Ota ensi käessä yhteyttä sinun omhaan seurakunthaan. Saatat kans tilata uuen äänestyskortin atressista www.svenskakyrkan.se/kyrkoval eli soittamalla Ruottin kirkon Vaalipalvelhuun numerhoon 018-16 96 00. Uusi äänestyskortti lähätethään sinun väestörejisteriin merkithyyn atreshiin (manthaalikirjotethuun atreshiin).